

Jeanroy

I.

Belhs m'es l'estius e-l temps floritz,
Quan l'auzelh chanton sotz la flor,
Mas ieu tenc l'ivern per gensor
Quar mais de joy m'i es cobitz;
Et quant hom ve son jauzimen
Es ben razos e d'avinen
Qu'om sia plus coyndes e guays.

II.

Er ai ieu joy e suy jauzitz
E restauratz en ma valor,
E non iray jamai alhor
Ni non querrai autrui conquistz,
Qu'eras say ben az escien
Que selh es savis, qui aten
E? selh es fols, qui trop s'irays.

III.

Lonc temps ai estat en dolor
E de tot mon afar marritz,
Qu'anc no fuy tant fort endurmitz
Que no·m rissides de paor.
Mas aras vey e pes e sen,
Que passat ai aquelh turmen,
E non hi vuelh tornar ja mays.

IV.

Mout mi tenon a gran honor
Tug silh, cui ieu n'ey obeditz
Quar a mon joi suy revertitz:
E laus en lieys e Dieu e lor,
Qu'er an lur grat e lur prezen,
E, que qu'ieu m'en anes dizen,
Lai mi remanh e lai m'apais.

V.

Mas per so m'en sui encharzitz,
Ja no'n creyrai lauzenjador,
Qu'anc no fuy tan lunhatz d'amor
Qu'er no'n sia sals e gueritz.
Plus savis hom de mi mespren;
Per qu'ieu sai ben az escien
Qu'anc fin'amor home non trays.

VI.

Mielhs mi fora jazer vestitz
Que despolhatz sutz cobertor
E puesc vos en traire auctor
La nueyt, quant ieu fuy assalhitz.
Tots temps n'aurai mon cor dolen,
Quar aissi's n'aron rizen,
Qu'enquer en sospir e'n pantays.

VII.

Mais d'una re soi en error
E'n estai mos cors esbaïtz
Que tot can lo fraire'm desditz
Aug autrejar a la seror;
E nulhs hom non a tan de sen,
Que puesc? aver cominalmen,
Que ves calque part non biaï.

VIII.

El mes d'abril e de pascor
Can l'auzel movon lur dous critz
Adoncs vuelh mos chans si? auzitz,
Et aprendetz lo, chantador!
E sapchatz tug cominalmen
Qu'ie'm tenc per ric e per manen
Car soi descargatz de fol fais.

- letto 350 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/jeanroy-10>